

## **KOROSI**

# **Poruva Korosiqinaahuani qara vara kyora**

Iesusira sivuma kyovaro nyaamwuni uro varuvaro 30 ihive nritarovaro Poruva karavuqi variqaro mwaa quara qara ntumwa tora. Korosiqinaahua mponramwuvanto Karaisira quara quutaave timwa kyeta varuvata vaisi mponramwuvanto uronte mwihua unra qua mwaanra timwa nyi varuvaro mwia kyaara Poruva qara mwaaqi Karaisira peqa okyara mwihua ntapihi kyero timwa nyunra.

**1-2** Nte Poruvama. Kotiva nai kyakya hiraqa ni nronraqama kyaihana nte nronraqamavi variqana Iesusi Karaisira qua nraakye qora timwa nyiqi vi varuvama varina.

Tire Timotikya nkye Kotira nraakye qora Korosiqi variahuanima mwaa quara qara ntumwa teta. Nkye Karaisiravata variqata mwianra nraahu riemwaqi vi variahuanra tita, nkye tiri tiqata vakyaama varita.

Kotiva tiri tiqova nkyi kyuqema nyatairaro nkyi mwutukya qihaakya hi varirata variate.

*Poruva mwihuara rieqaro Kotirara kyuqevertura*

**3-4** Nkye Iesusi Karaisirara kepukyaqama kye riemwaqi quavarro nkyi mwutukyavantovata ekyaa Kotira nraakye qorara vahira mwia tire riemwa ntapihi kyaunanrave. Nkye mwitaa

hiara mwianra rieqatama tire teta nronra vaisi Iesusi Karaisira qora Kotirara aakyara nteqata kyuqeve timwaqi vunanra.

**5** Haaru qutaa mwakyaakya Karaisira qua nkyi timwa nyuvata nkye mwi quara riovoro mwutukyaqitai kyuqe huvata tiqata, Mwi quara rieta hia raupiri hiraitita, nraakiara qioma nyaamwuni qati variqi quananrave, tura. Nkye mwitaa timwa kye nraakiara nkye nyaamwuni uro kyuqema kye varira, mwi entara vekya variqatara tita, nkye Karaisirara kepukyaqama kye riemwaqi viqata nanrianra nanrianra mwutukya vaihata variara.

**6** Haaru nkye Karaisira qua kyuqe qua riovoro nkyi su nyaatovanto ntapihuvata nkye Kotiva nkyi kyuqema nyataaninranra anomia kye rieta, mwiaqaatai nkye kyatarivanto tamwa kyuqe hira riaintema kyeta nkye kyuqe kyaiqa varaqi vi variara. Mpo mwatanaa mpo mwatanaahua variavaro Karaisira quavanto viro nrinro ihata mwihuavata mwi quara rieta mwiaqaatai mwihua nkyi nraantanteta kyuqe kyaiqa nraahu varaqi vi variara.

**7** Vaisi mpo Epaparaasiva Karaisira qua okyara nkyi timwa nyuvata nkye kyuqema kye mwi quara riora. Mwi vaisiva tiritana henava kuaa kyaiqa mwia varava variqaro mwiva tiri kyaahaqa hiqaro nraakte qora timwa nyi varira.

**8** Kotira mwanraquravanto nkyi kyaahaqa huvata nkye nanrianra nanrianra mwutukya vahuvata variqi vi varu quara Epaparaasiva nrumu tiri timwa timwuvata riaavanana.

**9** Nkyiara tiri timwa timwuvata mwi entaraqaatai hia mpo enta nkyiara taunru kyaraitita, mpo enta mpo enta nkyiara rieqa Kotirara aakyara ntamwaqi vi varunanra. Kotiva nkyi su nyaato kyuqema kyairata nkye Kotira kyaiga okyara qio riemwaqi viqata Kotira nai mwia kyakya hira nkye ntapihi kye taqeqlata qio vari nraakye qorahua variate tita, tire Kotirara aakyara nte varunanra.

**10** Kotiva mwitaama kyero nkyi kyaahaqa hirata nkye mwiaqaatai qioma mwia kyaiqa nraahu kyuqema kye varaqi vivara. Mwitaamaqi viqata nkye mpo kyaiqa mpo kyaiqa kyuqe kyaiqa vare varivaro Kotiva nkyiara qamwateqaro variananro. Mwitaamaqi viqata nkye kyatarivanto tamwa kyuqera riemwa taintema kyeta kyuqe kyaiqa, mpo kyaiqa mpo kyaiqa vareqlata Kotira okyarara riemwaqi viqata uro kyaata nraahu mpoqiaavata rievara.

**11** Kotiva anomia kepukyavanto varirara tita, tire mwianra aakyara nteqata nkyiara mwihua kepukyaqama nyataante tita. Kotiva nkyi kepukyaqama nyatairaro nkyi hia qamwanrama kyero pupohairata kepukyaqama kye variqi vivaro nkyi mwutukyaqitai kyuqe hi varirata variqi vivara.

**12** Kotiva ntuvaahaaninraqaa variqaro ntaqikyi variani mwatukyara Kotiva nai nraakye qorara rieqaro mwi mwatukyara mwihua kyaama tero. Mwiva nkyivata qioqama kyairara tita, nkyevata nraakiara qioma Kotira nraakye qora mpo ihua kyapata mwi mwatukyaraqi variqi vivara. Nkye

mwianra rieqata tiri tiqora Kotirara kyuqeve timwaqita quata.

<sup>13</sup> Haaru tire variavararo enta hu inraikyava tiri ntumwaqu kyovata tire enta huraqi variavararo Kotiva mwiqitairo tiri huvantu kyero tivitaqiro uro nai mwaqaqu mwianra mwutukya nti vaisiva ntaqikyi varinani kyaira. <sup>14</sup> Mwia mwaaquvanto Kotirani kyaiqa utu toraqaatai tire qatinani huvantu vita varuraro Kotiva tire uaqia hi kyaiqara varauna quara taiqa kyero nruka timwa taira.

*Karaaisiravata mwia peqa okyararavata tura*

<sup>15</sup> Tire hia qio taqaarava mwanriqa Kotivavata, tire qio taqaarava Karaaisivata, mwitanahua kuua qarama kyeta variara. Karaaisiva Kotira mwaqaqu vunyaava variharo ekyaa utu tai inraikyava mwia mwemwanima vahiro.

<sup>16</sup> Kotiva Karaaisira nronraqama kyovaro mwiva nyaamwuvata mwatavata ekyaa inraikya utu kyero vatora. Vaisivanto hia qio taqaani inraikyarave, qio taqaani inraikyarave, mwatani qoqaa variqatave

uqeta kye variqata ntaqikyiahuate, nyaamwuni ntaqikyiahuate, mwiva mwihua mwihua utu kyero vatero.

Ekyaa inraikyavanto Karaaisirani nraahu vahiarive tiro, Kotiva Karaaisira nronraqama kyovaro mwiva ekyaa inraikya utu kyero vatora.

<sup>17</sup> Vuni ekyaa inraikyavanto hia vahu entara Karaaisiva qati variqiro vura.

Mwaa entara Karaisiva variharora tiro,  
ekyaa inraikyavanto naitarama kyero  
qio vahiqiro vi varira.

<sup>18</sup> Karaisiva vuni variqaro qiata votima kyero  
varihiata

tire mwia nraakye qoravanto mwia nraakiarani  
mwia mwamwanta votima kyeta varunanra.

Mwiva vuni qati variqiro vihatara tita,  
tire mwia nraakye qoravanto  
qio qati variqi vi varunanra.

Karaisiva nraahu ekyaa inraikya nraatara kyero  
uro vuni variarive tiro,  
Kotiva mwia nraante qutu vuraqitairo  
qati vara sivuma kyora.

<sup>19</sup> Kotiva naivanto tiqaro,

Kyai nte Karaisiraqi variqi viqana  
ekyaa ntene kepukyavatama kye mwiaqi variqi  
virerave, tuvaro Kotira kepukyia okyaravanto  
ekyaa Karaisiraqi vhaura.

<sup>20</sup> Kotiva nyaamwunive mwatanive vahi inraik-  
yara

nte mwi inraikyara kyapata mwaateraqama  
variqana

kuaaqi varirerave timwa kyero nai mwaaqu tito-  
varo

mwiva kyatariqaa nraanre rauru kyero qutu vu-  
varo

mwia nraanrevanto ekyaa mwatanaa

vara mwaateraqama kyaihata

mwihua Kotiravata kuaaqi variqi vi variara.

<sup>21</sup> Nkye haaru Kotiraqaatai nyianrasata  
variqata nkye uaquia hi kyaiqara utiva nraahu  
nkyi su nyaatoqi vahuvata nkye uaquia hi

kyaiqara mwia nraahu utuqi viqata nkye mwia kyaara Kotira nramwutaahua varura.

<sup>22</sup> Nkye Kotira nramwutaahua varuvaro Karaisiva vaisi mwamwanta varero nkyiara rieqaro qutu vura. Mwitaa hurqaatairo Kotiva nkyivata mwaateraqama varirara tita, nkye qioma uro Kotira vuqaa varivaro mwiva nkyiara ni nraakyе qora kyuqe hiahuave, uaquia hi kyaiqava hia nkyiqi vaihata variahuave, hia nkyiqaa qua vaihata variahuave, qiananro.

<sup>23</sup> Haaru Karaisira qua nkyi timwa nyuvata nkye mwi quara rieta tiqata, Tire Karaisira nraaqiaraqama vita variqi vita nraakiara kyuqema kye nyaamwuni uro variananrave, tura. Nkye hia mwi quara qaqlira kyeta mpo qua riaraitita, Karaisira qua nraahu kepuqyaqama kye riemwaqi viqata hia pupohairata variqi vivera, nkye qioma tiqata, Kotiva tirivata taaqau viro kuaaqi variho, tivara. Nte Poruva Karaisira qua kyuqe qua nraakyе qora timwa nyinrenra nronraqama vuvama varina. Tire ekya mwa mwataraqaa varia nraakyе qorahua mwi quara timwa nyiqita vi varunanra.

### *Poruva Kotira nraakyе qoraqi kyaiqa varorara tura*

<sup>24</sup> Nte nkyiara rieqana nriqa vi inraikyara varaqi vura nte mwianra qamwateqana varuqo. Karaisiva Kotira nraakyе qorara mwihuua ni mamaanta votima kyetama variavo timwa kyero mwihuara rieqaro nriqa vu inraikyara varaqiro vura. Mwihuara rieqaro nriqa quani inraikyara varaqiro quariva hini qati vaihananra tina, nte Karaisira nraakyе qorara rieqana nte

Karaisira kyaahaqama kye nriqa vi inraikyara ntenga mwamwantaqaavata varaqi quariro qio-qama viro taiqa quari.

**25** Nkyi Kotira nraakye qoraqi kyaiqa varaarive tiro, Kotiva ni nronraqama kyaihana nte Karaisira qua okyaravata, tavaaravata, mwutuvata, ekyaa mwi quara nkyi timwa nyi varura.

**26** Haaru mpo vakya mpo vakya varu nraakye qorahua hia mwi quara riovoro mwi quava uqeta viro vahura. Mwaa entara Kotira nraakye qoravanto nraahu mwi quara riaate tiro, mwi quara qovarama kyaira.

**27** Mpo mwatanaa mpo mwatanaa mwia peqa okyara kyuqe okyara taqaate tiro, Kotiva nai uqeta tai quara nai nraakye qorara rieqaro qovarama nyataira. Kotiva uqeta tai quara mwia okyara mwataamama vahiro: Karaisiva nkyi mwutukyaqi variqiro vi varivama variro. Mwiva nkyi mwutukyaqi variqiro vi varirara tita, nkye nraakiara Kotiravata variqata mwia votima kye kepuuya nraakye qorama variqi vivara.

**28** Kotiva uqeta tai quava mwitaama vahirara tita, tire Karaisira qua mpo mwatanaa mpo mwatanaahua timwa nyiqi vi varunanra. Mwihua mwaa quarara nronraqama kye riaate tita, tire mwihua Kotira okyara qua, mpo qua mpo qua timwa nyiqi vi varunanra. Mwihua Karaisiravata kuaaqi variqata hia nraaqiara taaqa votima kye variraitita, mwihua kuaiqia kuaiqia avanto kepuuya nraakye qora variqata Kotira vuqaa qio uro variate tita, tire Karaisira qua mwihua timwa nyiqi vunanra.

<sup>29</sup> Nraakyे qoravanto mwitaama variate tina, Karaisiva kepukya ni mpira mwiaqotai nte kepukyaqama kye mwi kyaiqara vare varura.

## 2

*Karaísira qua nraahu riemwaqi viqata unra qua hia riaate tura*

<sup>1</sup> Nte nkyi timwa nyinrenra. Nkyivata, Reotisiaaqi variahuvata, mpo hiahua hia ni piri taqaahuavata, nte toqaamwu tu kyena kyaahaqamaqina vi varura.

<sup>2</sup> Nkyi mwutukyaqitairo qihaakya hirata nanrianra nanrianra mwutukya vahirata kuaaqi variqi quate tina, nte nkyi kyaahaqamaqina vura. Nte nkyi kyaahaqamaqina quarita nkye Kotira qua ntapihi kye rieqata mwi quara qutaa quama vaiho tiqata Kotiva uqeta tai quara, Karaísirara timwa tai quara, anomia kye riemwaqi quata.

<sup>3</sup> Kotiva nai kyuqe okyara, mpo okyara mpo okyara Karaísiraqi uqeta taiharo ekyaa mwi inraikyara Karaísiva qovarama kyaihata tire Karaísiraqitaima Kotira okyara, mpo okyara mpo okyara qio taqe varita. <sup>4</sup> Vaisi mpovanto unra qua nkyi timwa nyinrenro kyuqe kyuqe timwaqiro nrianinra mwia qua hia riaate tinama, nte mwi quara nkyi timwa nyina.

<sup>5</sup> Mate nte nyianrani variqana hiama nte nkyivata varina. Qio nte nyianrani variqanavata nte nkyivata varuva votima kyena variqana nte nkyi kyaiqara rieqana qamwateqanama varina. Nkye kuaa qua nraahu timwaqi viqata Karaísirara kepukyaqama kye riemwaqi vi variarara tina,

nte mwianra rieqanama mwutukyaqitai kyuqe ihana nkyiara qamwateqanama varina.

*Karaaisira qua rieqata mwiavata kuaaqi taaqauvi variqi quata*

**6** Nkye Iesusi Karaaisirara mwiva tiri vunyaa vaisivantove qia quarara rieqata nkye Karaaisiravata kuaaqi taaqauvi variqi quata.

**7** Kyatarivanto mwata kyuqeraqi tuqa tuta kyero kyuqema kyero qupiqaintema kyeta nkyevata nronra tuemwaqi viqata Karaaisiravata kuaaqi variqi quata. Karaaisirara timwa nyu quara, mwi quara nkye riemwaqi viqata kepuqyaqamaqita quata. Mwitaamaqi viqata Kotirara kyuqeve timwaqi quata.

**8** Mpowanto mwatanyaa qua okyara timwa nyiqanro mwi quaraqo nkyi ntumwaqu kyaankyo tita, nkye rauriqata variata. Mwi quava qumina unra quama vahiro. Qumina vaisivanto mwatanyaa okyarara nraahu rieqaro nai timwa mwi nai timwa mwi hia quava nraahuma mwi quava vahiro. Hia mwi quava Karaaisiraqaatairo qovara hira.

**9** Karaaisiva vaisi mwamwanta vataava variharo mwanriqavanto Kotiva qati variqi vi okyarava, ekyaa mwi okyarava Karaaisiraqi vahirara tita, **10** nkye Karaaisiravata kuaaqi variqi viqata nkye qio varia nraakye qorahuama variqi vita. Nyaamwunivata mwatanivata variqata mpo inraikya mpo inraikyaqaa ntaqikyi variahua variavaro Karaaisiva mwihua nraatara kyero vuni varivama variro.

**11** Nkye taaqau vita Karaisiravata kuaaqi variavararo mwiva nkyiqitairo qora kyaiqa teqa kyero kyaira. Mwiva hia lutaaisivanto nai mwaanra qua rieqaro qoraisi nraaqiara mwamwanta toqa kyaintema kyero nkyi mwamwanta toqa kyaira. Mwiva nkyiara hia api vu nraato tiqata uaqia hi kyaiqara utuate tiro, nkyi mwutukyaqitairo uaqia hi kyaiqara toqa kyaira.

**12** Nkye haaru nramanri vareqa Karaisiravata varuvararo mwi entara nkyi Karaisiravatama kyeta quntamwa tora. Nkyi quntamwa tovata nkye Kotiva Karaisira qutu vuraqitairo qati vara sivuma kyorara kepukyaqama kye riemwaqi quavarora tiro, mwiva Karaisira vatama kyero nkyivata quntamwa toraqitai qati vara sivuma kyora.

**13** Haaru nkye qora kyaiqa nraahu utuqi vurara tita, nkye qutu vuhua votima kyeta varura. Mwi entara nkyi mwutukyaqitairo hia nkyi qora kyaiqa toqa nyatovatara tita, nkye hia qioqama kye varura. Qio mwaa entara Karaisira vatama kyero Kotiva tiri qati vara sivuma kyero ekyaa tiri qora kyaiqa mwi quara nruka timwa taira.

**14** Tire Kotira qua, mpo qua mpo qua nteqa kye variavararo mwia kyaara tiriqaa qua nronra vahuvare Kotiva mwi quara vara kyero Karaisira ruto kyatariraqaa mwi quaravata rutovaro Karaisiva tiriara rieqaro qutu viro tiriqaa qua vahura taiqa kyora.

**15** Karaisira kyatariqaa hiritovaro mwiva mwiaqaa variqaro tiriqaa qua vahura taiqa timwa torara tiro, Saataanivavata, mwia henahua vaana vunyahuavata, tiriqaa qua

vateva hia vahura. Hia vahuvaro Karaisira kyatariqaa hiritovaro variqaro nraakye qora suqaa mwihua kepukya nteqa kyero mwihua nraatara kyora.

**16** Karaisiva mwitaa hurara tiro, haunri mpovanto nkyi ntavaaqaviqaro nkyiara haaruua mwaanra qua rieqata nkye mwi kyararave mwi nramanrinrave nrevorave, mwi entara mwi entara nronra entaqaa mwitaa mwitaa hiate, qaraakya tora nri ntaaninraqaa mwitaa mwitaa hiate, Iutaa mwaanra entaqaa nkye mwitaa mwitaa hiate, qiankyorave. Mpovanto qovarama viro mwitaa mwitaa hiate tiqaro nkyi ntavaaqavu kyaarivaarave.

**17** Ekyaa mwi okyarava quaahaqa vahi okyaravama vahiro. Karaisiva qovarama viro ekyaa mwi okyarara taiqa kyairama. Ekyaa mwi okyarava mamanaanru votima kyero vaiharo Karaisiva qutaa inraikya mwivama variro.

**18** Mpo ihua nkyiara tiqata, Nrivaqe tetu nrutu vara mwataniqamaqi viqata nyaamwunyaahua nyutu tuaaheraqi quare, ti variara. Nkye mwi vaisihua qua riemwaqi viqata apiqama vivora. Mwi vaisihua tire ruvaata taqaurahuave tiqata qumina mwatanyaa okyara riemwaqita mwihua nkyiari nyutu nraahu tuaaheraqi vi variara.

**19** Mwi vaisihua Karaisira qaqlira kyeta hia mwiavata kuaaqi variara. Karaisiva tiri qiata votima kyero varihata tire mwia mwamwanta votima kyeta varunanrave. Mwamwantave, kyuqu kyauquve, nrunrunruve, ekyaa mwi inraikyava qiatavata taaqau viro vahiraro qioma vaisivanto kepukyaqa hiro nronra

tuemwa quananro. Mwia votima kyeta tire Karaisiravata taaqauvi kuaaqi variarera, tire mwia mwamwanta variqata qioma nronra tuaananra. Tiriara mwihua mwitaamaqi viqata nronra tuemwa quate tiro, Kotira mwutukya vahira.

**20** Nkye Karaisivavata qutu vurara tiro, mwatanyaaa okyara mpo okyara mpo okyaravanto hia nkyiqa ntaqikyihata nkye qatinani huvantu vita variara. Nkye qatinani huvantu vi variahura tita, nkye nanraqamave mwatanyaaa okyarara nronraqama kye riemwaqi vi varita?

**21** Mpo hiahua nkyiari riemwa kye tiqata, Hia mwi inraikyara tu varaante. Hia mwi kyarara nraante. Hia mwi inraikyara tu vareqara taqaante, ti variara. Mwihua mwitaa qiavata nkye nanraqamave mwihua qua riaavo?

**22** Mwihua mwitaa ti varia inraikyava, mwi inraikyava pataquia vahi inraikyava vaiharo vaisivanto mwi inraikyara vara kyaiharo taiqa vi inraikyava nraahuma vahiro. Qumina vaisivanto nkyiari riemwa kyeta mpohua timwa nyiqata tiri qua vataqi quate ti varia quava nraahuma vahiro.

**23** Airi nraakye qoravanto qao timwa tai quara rieqata kyuqe quave qiavarovata mwi quava hia kyuqe quama vahiro. Vaisivanto mwi quara riemwaqiro viqaro nai nrutu vara mwataniqamaqiro viro kyara aurero nai mwamwanta ntuqutuqiro viro mwitaamaqiro quari okyarava hiama qio mwia kyaahaqa hiananro. Mwi quara

riemwaqiro quariva qati nraahuma uaquia hi kyaiqara utuqiro quananro.

### 3

#### *Kotiva Karaisiravatama kyero tiri qati vara sivuma kyaira*

<sup>1</sup> Kotiva Karaisiravatama kyero nkyi qati vara sivuma kyaihata variarara tita, nkye nyaamwuni vahi inraikyarara nronraqama kye riemwaqita quata. Nyaamwuni Karaisiva kepukyavanto Kotira kyauqu kyaatutani mwatakyaa viro varira.

<sup>2</sup> Nkye nyaamwuni vahi inraikyarara nronraqama kye riemwaqi viqata hia mwatanu vahi inraikyarara riemwaqi quata.

<sup>3</sup> Nkye Karaisiravata qutu quarara tita, nkye Karaisiraqi variqatama nkye Kotiravata kuaaqi varita.

<sup>4</sup> Karaisiva qati variqiro vi varirara tita, nkyevata qati variqi vivara. Mwiva nraakiara qovara hirata nkye mwi entara mwiavata qoqaa variqata mwiva kepukyaqama kyero kyuqema kyero variqi vintema kyeta nkyevata kyuqema kye variqi vivara.

<sup>5</sup> Mwi quara rieqatama nkyi su nyaato mwutukyaqitairo mwata mwaqaanaa kyaiqa api kyaiqa varera ru taiqa kyaivarero ekyaara taiqa quari. Nraakye qora api qaraqita nrohi okyararave, nraakye qoravanto nkyiari mwamwantaga hia kyuqema ntumwaqi okyararave, mpohua nraata vaatiqama kye uaqima kye vu taqe okyararave, qora kyaiqa vararerera uti varirave, mpo

inraikya mpo inraikya vara ntuvantua hirarave, mpo inraikya mpo inraikya vara ntuvantua ihua, mwihua unra mwanriqa nrutu tuaahere variahua votima kye variqata Kotira qaqlira kye variara.

<sup>6</sup> Nraakye qoravanto ekyaa mwi kyaiqara uti varivaro Kotira mpoqama kyero raraqa tairaro mwihuaqaa nronraqama kyeroma qua vataananro. <sup>7</sup> Nkyevata haaru variqata mwi aanranraqaa nraahu variqi vi varurave.

<sup>8</sup> Mate mwaa entara nkye ekyaa api okyara mwitaa hiani okyarara qaqlira kyeta nrohiata. Raraqa taani okyararave, inronra hiqata ntaqirera uti okyararave, mpohua nramwutaaqa hi okyararave, ekyaa mwi okyarara qaqlira kyeta nrohiata. Uaqia hi quavave, quaaru tivave, nkyi nyogitairo nriankyora.

<sup>9</sup> Haaru nkyi su nyaato mwutukyavanto uaqama kyero vahuvata nkye api aanraqaa nraahu nrohura. Mwiaqaatai nkye api nrohu aanranra qaqlira kyeta variarara tita, hia nanrianra nanrianra unra qua qiata.

<sup>10</sup> Mwaa entara Kotiva nkyi su nyaato mwutukya vara kyero qaraakya utu tairara tita, nkye kyuqema kye variqi vivaro Kotiva nkyi vara kye qaraakya utuqiro virata nkye Kotira nraantantamwa kye variqata Kotira okyara kyuqema kye taqaata.

<sup>11</sup> Kotiva nkyi qaraakya utu kyero vataivara tiro, mwiva hiama nkyiara tiqaro, E mpo mwatanaave, e Iutaave; e mwamwanta toqa kyai vaisivave, e hia mwamwanta toqa kyai vaisivave; e nronra mwatanaave, e pata mwatanaave;

e rupa taihara variara vaisivave, qati variara vaisivave; qiananro. Kotiva hia nkyi tukyama kyero mwitaa tiraitiro, nkyiara nkye Karaisiravata kuaaqi variahuavema qiananro. Karaisiva ekyaa Kotira nraakyе qoravata kuaaqi variqiro vi varira.

<sup>12</sup> Kotira mwutukyavanto nkyiara vaharo nkyiara mwihua ni nraakyе qora variqata mwihua ni kyaiqa nraahu varaqi quate tiro, Kotiva nkyi nai kyaama taihata nkye variara. Nkye mwitaa hi variarara tita, nkye nanrianra nanrianra po kye tiqata kyuqemagita quata. Hia nkyeta nyutu tuaaheraqi viraitita, mpohuara qishaakyamaqi vivaro hia pupohairata variata.

<sup>13</sup> Nkye hia inronra hiraitita, nai kyaahaqa hi nai kyaahaqa hiqata variqi quata. Nkyiqitairo mpovanto nai qata vakyaara mpo qua timwa kyaire, mwi vaisirara qamwanrama kyera ena qata vakyaara qiove i qua qaqlira kyaquo hia qua vaiho qiante qiat. Nkye mwitaa timwaqita quata. Tiri nronravanto Karaisiva nkyi qua qaqlira kyero nruka nyataintema kyeta nkyevata mpohua qua qaqlira kyeta taunru kyaata.

<sup>14</sup> Nkye ekyaa kyuqe kyaiqa mwia varaqi viqata nanrianra nanrianra mwutukya vahirata variata. Nkye mwitaama variqi vivera, nkye kuaara nraatima variqi vivara.

<sup>15</sup> Karaisiva nkyi mwutukya qishaakyama nyataihata nkye variarara tita, nkyi mwutukyaqitai qishaakyा hi varirata variata. Mwitaama variqata kuaara nraati Karaisira mwamwanta votima kyeta variqita quate tiro, Kotiva nkyi

nyaanrama taira. Mwianra rieqata Kotirara kyuqeve timwaqi quata.

<sup>16</sup> Kyaivaro Karaisira quavanto anomia kyero nkyi kyaahaqa hiari quava nkyi su nyaato mwutukyaqi vahirata nkye mwi quarara nraahu riemwaqi viqata nrohiata. Kyuqe vu nraato tu kyeta Kotira qua okyara nai timwa mwi nai timwa mwi hiqata kyuqe aanra nai nraamwute nai nraamwute hiqata variata. Kotirara qamwateqata ihi qiata. Kotira qua ihiqama kye timwaqi quata. Kotira nrutu tuaahereqa mpoqiaavata ihi timwaqi quata.

<sup>17</sup> Nkye mpo kyaiqa mpo kyaiqa varaqi viqatave, nkye mpo qua mpo qua timwaqi viqatave, Karaisira nrutuara riemwaqi viqatama mwitaa hiata. Karaisira nrutu nteqatama Kotirara kyuqeve qiata.

*Nkye Kotirara rieqata mwataama kye qua riemwaqi viqata variqi quata*

<sup>18</sup> Nte nkyi nraakyе vaati vataahuara qiarita riaata. Nkye nkyeta saatimwanra qua riemwaqita quata. Nkye Karaisira nraaqiara variahua tita, nkye mwitaamaqita quata.

<sup>19</sup> Nte nkyi mwihua saatiara qiarita riaata. Hia nkyeta nyaatamwanra uaqiamma nyataraitita, mwihuara mwutukya vahirata variqita quata.

<sup>20</sup> Nte nkyi nraaqiara qiarita riaata. Nkye mpo enta mpo enta nkyeta nyohua sohua qua rieqata variqi quata. Nkye mwitaamaqi vivaro Kotiva nkyiara qamwateqaro variananro.

<sup>21</sup> Nte nkyi nraaqiara sohuara qiarita riaata. Nkyi nraaqiara vanto hia qaiqaavata kyuqe

kyaiqa varaananrave tivo tita, hia mwihua inron-ramaqita quate.

<sup>22</sup> Nte nkyi kyaiqa vaisiara qiarita riaata. Nkye nkyitaqaa ntaqikyi vaisihua qua rieqata kyaiqa varaata. Hia vaisivanto qamwata nyataate tita, mwihua suqaa nraahu variqata kyaiqa varaata. Nkye tiri vunyaa vaisi Karaisirara nronraqama kye riemwaqi viqata mwihua kyaiqa ntapihi kye varaataa hirata varaata.

<sup>23</sup> Nkye vaisi mponi mpo kyaiqa vareqata nkye Karaisira kyaiqama varauro timwa kyeqata kyuqema kyeta varaata.

<sup>24</sup> Mwaa quara riaata. Nkye vaisi mponi kyuqema kye kyaiqa vare varivar nraakiara tiri vunyaa vaisivanto nkyi kyaiqara rieqaro mwia qiata nkyita kyoqaa nyinrata nkye mwiva nai nraakye qorara rieqaro nkyiari kyaama taani inraikyara varevara. Nkye Karaisira kyaiqa vaisi variarara tiro, Karaisiva nkyi kyaiqara rieqaro mwia qiata kyoqaa nkyita nyiananro.

<sup>25</sup> Mwaa entara vaisivanto uaquia hi kyaiqara utuqiro quaninra nraakiara Kotiva mwianra rieqaro nai kyoqaa ntapihi kyeroma nai mwiananro. Kotiva hia mwi vaisira nrutuara rieqaro qamwata mwataraitiro, ntapihi kyeroma mwia qua tukya hiananro.

## 4

<sup>1</sup> Nte nkyi kyaiqa vaisiqaa ntaqikyi variahuara qiarita riaata. Nkye ntapihi kyeqata nkyeta kyaiqa vaisiqaa ntaqikyi quata. Nkyitaqaaavata nyaamwuni variva ntaqikyi varirara tita, nkyeta kyaiqa vaisiqaa kyuqema kye ntaqikyi quata.

*Mwaa quaravata riemwaqita quate tura*

<sup>2</sup> Hia qoriri hiraitita, mpo enta mpo enta Kotirara aakyara ntamwaqita quata. Hia vaite variqata Kotirara aakyara tiraitita, su nyaato tu kyeta aakyara nteqata Kotirara kyuqeve timwaqita quata.

<sup>3</sup> Nkye Kotirara aakyara nteqata tiriara mwihua kyaahaqa hirata Karaisira qua timwa nyiqi viva aanra vahiarive qiata. Nte Karaisirara uqeta tai quara nraakye qora timwa nyiqina vuvama varina. Mwi quara nraakye qora timwa nyunra kyaara ni rupa kyaavanama mwaaqi varina.

<sup>4</sup> Qio nianra rieqata Kotirara aakyara ntaivaqena nte ntapihi kye Karaisira qua nraakye qora timwa nyianrita ntapihi kye riaata. Haunri nte api qua timwa nyiankyora.

<sup>5</sup> Karaisira qua hia rie nraakye qorahua vari-vata nkye mwihua suqaa ntapihi kye nrohiata. Hia nkye mwihuavata qumina variraitita, nkye taqaivaro Karaisira qua timwa nyi aanrava vahirata nkye Karaisira qua mwihua timwa nyiata.

<sup>6</sup> Nkye mwihuavata qua tiqata hia mwihua qoriri hiani quara tiraitita, mwihua kyakya hiani quara tivata mwiaqaatai mwihua mpo quara nkyi kyapara hivata nkye qio nkysiari timwa nyintema kyeta variata.

*Qua mwanteqaro ekyaara qua tura*

<sup>7</sup> Tikikaasiva ni mwakyaakya nkyi timwama nyiananro. Tikikaasiva tiri tiqata vakya kyuqeva variqaro ntapihi kyeqaro tirivata kuua kyaiqa Karaisira kyaiqa vare varira.

<sup>8</sup> Nte mwia titaariro mwiva nkye varinani uro

tiri mwakyaakyaa nkyi timwa nyinrata nkyi mwutukyavanto kyuqe hirata qamwateqata variata.

<sup>9</sup> Nte mwiavata Onisimaasiravata titaarita vivara. Onisimaasiva tiri tiqata vakya kyuvavama. Mwiva qutaaqama kyero ekyaa kyaiqa vare varivama variro. Mwiva nkyiqinaavama variro. Mwitanahua vihua uro mwaini vahi mwakyaakyara nkyi timwa nyivara.

<sup>10</sup> Arisitakaasiva mwiva nivatama kyero rupa taava, mwiva nkyi qua mwantero. Vanavaasira qata Maakivavata nkyi qua mwantero. Nte vaakya nkyiara tiqana, Maakiva nkye hinani virera nkye mwia qamwata mwateta mwia vitaate, tura.

<sup>11</sup> Iosuaava mwia mpo nrutu Iasitaasivave qia vaisiva, mwivavata nkyi qua mwantero. Kotira nraaqiara Iuttaaqitai qio taarampo mwinramwuhua nraahu nivata variqata Kotiva ntaqikyiani quarara nronraqama kye rieqata ni kyuqema kye kyaahaqa hi variara.

<sup>12</sup> Epaparaasivavata nkyi qua mwantero. Mwivavata nkyiqinaava Iesusi Karaisira kyaiqa vaisima variro. Mwiva nkyiara rieqaro kepukyaqama kyero Kotirara aakyara nte varira. Mwiva nkyiara Kotirara aakyara ntero tiqaro, Kotio, e mwihua kyaahaqa hirata mwihua hia pupohairata kepukyaqama kye variqata hia nraaqiara taaqa variraitita, kepukya nraakte qora variqata i qua kyuqema kye riemwaqita quate, tira.

<sup>13</sup> Nte taqauqaro mwi vaisiva kepukyaqama kyero kyaiqa vareqaro nkyivata Reotisiaani vari-

ahuavata, Hiraporisini variahuavata, kyaahaqa hi variro.

<sup>14</sup> Rukuva tiri totaa kyuqevavata, Ntimaasivavata, nkyi qua mwanteta.

<sup>15</sup> Tiri tiqata vakya Reotisianni variahuavata mwihuara rieqana mwihuua qua mwantaura timwa nyiata. Nraakye mpo Nimpaaravata mwia nraamwuqi ntuvantua hiahua, mwihuuaravata nte rieqana qua mwantaura timwa nyiata.

<sup>16</sup> Nkye qara mwaa kyaara ntumwa kyeta Kotira nraakye qora Reotisiaqinaahuavata nyivata mwihuavata kyaara ntuata. Mwiaqataita nte qara mpo, Reotisiaqinaahuani vara kyaura, mwia nkyevata vara kyeta kyaara ntuata.

<sup>17</sup> Nkye Akipaasira mwitaama kye timwa mwiata. Tiri nronra Karaisiva i kyaiqa mwinra qutaaqama kyera varaqira vira uro taiqa kyaante, qiata.

<sup>18</sup> NTE PORUVAMA, ntena kyuauquqo qara ntiquanama nkyi qua mwante varuqo. Ni rupa taavana mwaaqi varuraravata hia taunru kyaata.

Kotiva nkyi kyuqema nyataarive tuqo.

**QARAAKYA QUA TIMWATORA  
The New Testament in the Omwunra-Toqura (South  
Tairora) Language of Papua New Guinea  
Nupela Testamen long tokples Omwurna-Toqura long  
Niugini**

copyright © 2000 Wycliffe Bible Translators, Inc.

Language: Omwunra-Toqura (South Tairora) (Tairora, South)

Dialect: Omwunra-Toqura

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 11 Nov 2022 from source files  
dated 9 Oct 2020

73e2f29d-4ca4-50e6-a471-722ac8ab5666